

**Date – 10/05/2026**  
**Time - 7:30 -7:40 Hrs**  
**AKASHVANI AIZAWL**

## REGIONAL NEWS BULLETIN

### HEADLINES (MORNING)

1. **Health Minister Pi Lalrinpuii chuan thalaite chu ram hma hun inngahna an ni tih a sawi.**
2. **Mizoram chuan hriat theih chinah kum 17 chhunga khualzin a ngah bertum a tawng.**
3. **CYMA General Secretary Prof Malsawmliana chuan Ruihhlo Do Street Campaign an neih chu mipui hnena ruihhlo that lohzia zirtirna a ni tih a sawi.**
4. **Tamil Nadu-ah chuan IUML ten sawrkar siam tura TVK tan thlawp anga thuthang chu a dik lo an tih avangin sawrkar siam tur ala chiang thei lo.**

<><><>

### HEALTH MINISTER

**Health Minister Pi Lalrinpuii chuan thalaite chu ram hma hun inngahna an ni tih a sawi.**

**Nimin khan C. Thuamluaia Mualah 2 Mizo Battalion National Cadet Corps (NCC) bul tuma Mizorama NCC Fest & Parasailing Camp hmasa kalpui mek chu Pi Lalrinpuii hian a tlawh a. Khuallian Pi Lalrinpuii chuan, Thalaite chu ram hma hun inngahna an nih angin khawvel thiamna, inrelbawlina leh ei leh bar dinhmun danglam zel mila inher rem a, an thiamna leh theihna tuai hriam zel tur te, ram inpumkhatna vawng nung zel tur leh ram tana mi chhenfakawm nih tum zel tur te'n a chah.**

**Viksit Bharat 2047 hlawhtlin nan Mizoram sawrkar chuan mipui sawrkar, sawrkar tha leh lang tlang kalpuiin State chhunga hmasawna rualkhai tak a awm theih nan theih tawp a chhuah tih sawiin, Lungleia Mizoram State University din tura ruahmanna leh hmun hrang hranga hmasawna hna thawh kal mek te, Mizorama NCC Fest & Parasailing Camp hmasa ber chhim lama buatsaih te chu a nem nghettu a nih thu a sawi bawk.**

**NCC Fest-ah hian sawrkar hotu pawimawh leh sipai hotu liante nena inkawmna hun (interactive session) te, NCC chhuak (alumni)-te nena inkawmna hun te buatsaih niin, stall hrang hrang –NCC thil leh hriat tur pawimawh pho chhuahna, Border Security Force, Assam Rifles leh Territorial**

Army Bn te ralthuam pho chhuahna leh District Legal Services Authority leh District Disaster Management Authority stall te buatsaih a ni.

<><><>

## LAWNGTLAI TAEKWONDO

Directorate of Women and Child Development leh Mizoram Amateur Taekwondo Association te thawk dun chuan District hrang hrangah Hmeichhe naupang leh Mipa naupang tan Self-Defence Training nei turin ruahmanna a siam a. Lawngtlai District ah pawh Lawngtlai District Amateur Taekwondo Association leh Women & Child Development Lawngtlai District te chuan school thenkhat ah te kalpui turin ruahmanna a siam.

Lawngtlaiah hian a hawna hun leh training bul tanna chu PM Shree Model English School ah neih a ni a, zirlai naupang 250 chuangin Self-Defence Training hi an zawm nghal ani.

<><><>

## TOURIST

Mizoram chuan hriat theih chinah kum 17 chhunga khualzin a ngah bertum a tawng.

Sorkar chhinchiah danin, kum liamta 2025-26 chhung khan Mizoramah khualzin mi nuai 9, sing 8 leh 518 chhinchhiah an ni a, an zinga nuai 9 sing 6 sang 6 leh 60 hi India mi niin, rampawn mi (foreigner) 14,558 an awm a ni.

Ram pawn atanga rawn zin lut zingah hian Myanmar mi 10,956 awmin an tam ber a, foreign tourist chhinchhiah zat atngin za zela 75.26 an tling. Myanmar mite dawtah hian USA atanga rawn lut an tam ber a, mi 878 niin, foreign tourist chhinchhiah zat atanin zaa 6.03 an ni.

Tourism department hian kum 2023-24 atangin foreign tourist bik hi an ram mal angin a tarlang a; kum 2023-24 khan foreign tourist 3,884 awmin, heng zinga 1,336 hi USA atanga rawn lut niin an tam ber a, Australia atanga rawn lut mi 298 ten an dawt. Kum 2024-25 khan foreign tourist 5,911 chhinchhiah niin, Myanmar atanga rawn lut mi 1,472 leh USA atanga rawn lut 1,222-te chu a tam ber leh a dawttu an ni bawk.

Kum 2023-24 data atanga a lan danin nikum 2025-26 thleng khan Mizorama foreigner rawn zinte zingah hian Myanmar, USA, Australia, UK, Japan leh Israel mite an tam zual a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## STREET CAMPAIGN

**CYMA General Secretary Prof Malsawmliana chuan Ruihhlo Do Street Campaign an neih chu mipui hnena ruihhlo that lohzia zirtirna a ni tih a sawi.**

**Nimin zing khan CYMA bul tumin Aizawl khawpui hmun hrang hrangah Ruihhlo Do Street Campaign hi neih a ni a. Akashvani News Aizawl zawhna chhangin Prof Malsawmliana chuan Mipui ten ruihhlo that lohzia leh ruihhlo do a pawimawhzia an hriat a pawimawh thu a sawi a, YMA Branch hrang hrang ten anmahni huamchhungah theihtawp an chhuah thu leh ruihhlo la ti ve lo ten an tih chhin loh nan leh, a ti thin ten an sim bakah a zuar an tlem theih nan theihtawp an chhuah zel dawn tih a sawi bawk.**

**Central YMA chuan ruihhlo do kawnga theihtawp chhuah tur leh mahni theihna zawn theuhvah ruihhlo do kawnga pen chhuak turin mipuite an sawm a. Ruahman dan chuan Street Campaign hi May ni 16, Inrinni zing dar 7:30 hian hmun 8-ah neih leh tur a ni ang.**

**Central YMA hnuaia ruihhlo do pawl, Central Anti Drugs Squad (CADS) chuan tun thla ni 1 atanga nimin thleng khan ruihhlo engemaw zat leh ruihhlo kaihnawihah mi 42 an man tawh a ni.**

<><><>

**CS**

**Chief Secretary Pu Khiili Ram Meena chuan cooperative sector in Mizote nunah nasa takin hna a thawk tih a sawi.**

**India hmarchhak a Cooperative Society te tana workshop y ‘Sahkar se Samridhhi’ chu tun hnai khan Aizawl Assembly House Conference Hall-ah khar a ni a, he hunah hian Chief Secretary Pu Khiili Ram Meena chuan cooperative sector chuan Mizote nunah nasa takin hna a thawk a. Mizoram chu India rama a hmasa pawl ni turin Registrar Society Office chu a computerize vek tawh a ni a, Primary Agriculture Cooperative Credit Societies (PACS) 24 te pawh computerize tawh niin, 75 dang te chu computerize mek an ni a ti a. Mizoram sawrkar leh cooperative sector te chuan Bana Kaih hmangin kawng hrang hrangin hna an thawk ho tih a sawi bawk.**

**He zir hona hi sorkar laipui Ministry of Cooperation, NABARD leh State Cooperation Department buatsaih a ni a, India hmarchhaka Cooperation Secretary-te leh Cooperative Society a Registrar te an tel a ni.**

**Ministry of Cooperation Secretary Dr. Ashish Kumar Bhutani chuan north-east region in harsatna a tawh bikte hre chung zela hma lak a pawimawh thu a sawi a, state tin atanga kalkhawmte chu an hmalakna kawng hrang hrangah National Cooperative Development Corporation (NCDC) tanpuina hmang tangkai turin a fuih a ni. India rama cooperative bank te pui turin sorkar laipui chuan Sahakar Sarathi leh National Urban Cooperative Finance and Development Corporation a awm tih a sawi bawk.**

<><><>

**CM of West Bengal Takes Oath**

**Suwendu Adhikari chuan nimin khan West Bengal-a BJP Chief Minister hmasa ber niin, rinawmna thu tiam a la. Kolkata-a Brigade Parade Grounds-a inkhawmpui neihah Governor RN Ravi chuan**

**Adhikari chu thutiam hi a laktir a ni. Amah rual hian MLA dang panga Dilip Ghosh, Agnimitra Paul, Ashok Kirtania, Nisith Pramanik leh Kshudiram Tudu te chu Cabinet Minister atan lakluh an ni ve bawk.**

**He hunah hian Prime Minister Narendra Modi, Union Home Minister Amit Shah, Defence Minister Rajnath Singh, NDA leh BJP rorelna state hrang hrang Chief Minister te, BJP President Nitin Nabin leh BJP hruaitu dang eng emaw zat an tel a ni. Poet Rabinadrath Tagore piancham vawi 165-na pualin Pochishe Boishak-ah hun hi hman a ni.**

**Tun hnaia State Assembly inthlanpui neihah BJP hian hnehna an chang a, member 294 awmna house-ah seat 207 an hmu a a ni.**

<><><>